

आकाशवाणी जयपुर-अजमेर
प्रादेशिक समाचार

दिनांक 20.06.2025

समय: 18.45 बजे

- व प्रदेश रा आधा ऊं बत्ता हलका चौमासा री बिरखा ऊं तर व्ह्या-जयपुर, अजमेर, जोधपुर अर उदयपुर संभाग मांय आज कठे-कठे भारी ऊं घणी भारी बारिश व्हेवण रा आसार।
- व एक पृथ्वी-एक स्वास्थ्य के लिए योग थीम माथे पूरी दुनिया मांय काल अन्तर्राष्ट्रीय योग दिवस मनायो जावेला।
- व राष्ट्रपति द्रौपदी मुर्मू दिव्यांगजन ने जिन्दगी रा हर हलका मांय बधावो देवण माथे जो दीनो।

अर

- व खान विभाग चालू माली साल मांय हाल ताई 1 हजार 670 करोड़ रुपया री रिकॉर्ड आमदनी हासिल कीनी।

000

प्रदेश रा आधा ऊं बत्ता हिस्सां मांय चौखी बिरखा व्ही है। काल सब ऊं बत्ती 11-11 सेंटीमीटर बरसात बिजोलियां, फुलेरा, रामगंज मण्डी, दानपुर अर निम्बाहेड़ा मांय व्ही। बांसवाड़ा, बूंदी, बारां, करौली, झालावाड़, धौलपुर अर कोटा मांय ई कठे-कठे झमाझम बिरखा व्ही। प्रतापगढ़, चित्तौड़गढ़, सिरोही, भरतपुर अर अजमेर मांय ई केई ठौड़ां मूसलाधार बरसात रा समाचार है। म्हाणा भीलवाड़ा खबरनवीस बतायो के जिला मांय व्हे रही चौमासा री बरसात ऊं गर्मी ऊं साता मिली है।

कोटा मांय ई आज संवारे ऊं ई कदे रिमझिम तो कदे तेज बारिश रो दौर चाल रह्यो है। चौमासा री बिरखा सरू व्हेवण सागे ई बंधां मांय ई पाणी आवण लाग्यो है। भरतपुर अर सवाईमाधोपुर मांय ई व्हे रही चौखी बिरखा ऊं नदी-नाळा उफणबा लाग्या है अर नीचला हलकां मांय पाणी भर ग्यो है। करौली अर आरे-सारे रा हलकां मांय व्ही जोरदार बारिश ऊं मौसम सुहावणो व्हे ग्यो है। सिरोही मांय ई आज रिमझिम बिरखा व्ही। ई बीचे राज्य रा ऊगणी हलका रे ऊपर आज ई परिसंरचण तंत्र बण्योड़ो है। मौसम विभाग रे मुजब आज जयपुर, अजमेर, जोधपुर अर उदयपुर संभाग मांय कठे-कठे जोरदार मेह व्हेवण रा आसार है। कोटा, भरतपुर अर बीकानेर संभाग मांय ई कठे-कठे बादळां री गाज सागे बारिश व्हेवण रा आसार है।

000

प्रधानमंत्री नरेन्द्र मोदी कह्यो है के दुनिया भारत री बरकत री सराहवणा कर रही है अर भारत दुनिया री तीजी मोटी माली ताकत बणबा ओड़ी तेजी ऊं बध रह्यो है। श्री मोदी आज बिहार मांय विकास री न्यारी-न्यारी परियोजनावां रा उद्घाटन अर नुवा कामां री नींव रखण रे मौके बोल रह्या हा। प्रधानमंत्री कह्यो के दुनियाभर रा धनवान देशां रा नेता भारत री बरकत माथे अचरज कर रह्या है।

000

मुख्यमंत्री भजन लाल शर्मा आज जयपुर मांय राजस्थान अनुसूचित जनजाति परामर्श दात्री परिषद् री मीटिंग लीनी। मीटिंग मांय श्री शर्मा अहलकारां ने जनजातीय समुदाय रा भला अर विकास ऊं जुड़ी योजनावां माथे असरदार तरीका ऊं काम करण रा हुकम दीना। मुख्यमंत्री आज ई गुजरात रा गांधी नगर मांय अहमदाबाद विमान हादसा मांय देवलोक व्ह्या गुजरात रा पैली वाळा मुख्यमंत्री विजय रूपाणी री श्रद्धांजलि सभा मांय सिरकत कीनी। वे रूपाणी रा पिरवार वाळां सागे ई मुलाकात कर र दुःख जतायो। मुख्यमंत्री रो आज जैसलमेर पूगण रो ई कार्यक्रम है।

000

मुख्यमंत्री भजन लाल शर्मा आज राजस्थान अनुसूचित जनजाति परामर्श दात्री परिषद् री मीटिंग लीनी। मीटिंग मांय श्री शर्मा अहलकारां ने जनजातीय समुदाय रा भला अर विकास ऊं जुड़ी योजनावां माथे असरदार तरीका ऊं काम करण रा हुकम दीना। मुख्यमंत्री आज ई गुजरात रा गांधी नगर मांय अहमदाबाद विमान हादसा मांय देवलोक व्ह्या गुजरात रा पैली वाळा मुख्यमंत्री विजय रूपाणी री श्रद्धांजलि सभा मांय सिरकत कीनी। वे रूपाणी रा पिरवार वाळां सागे ई मुलाकात कर र दुःख जतायो। मुख्यमंत्री रो आज जैसलमेर पूगण रो ई कार्यक्रम है।

000

एयर इंडिया री परदेश मांय आवण—जावण वाळी केई उड़ानां संचालन अर रख—रखाव रे कारण रद्द कर दीरीजी है या वां री तादाद कम कर दीरीजी है। एयर इंडिया ऊं मिली जाणकारी रे मुजब अमृतसर ऊं लंदन अर गोआ ऊं लंदन री उड़ानां 15 जुलाई ताई अर दिल्ली ऊं नैरोबी री उड़ान 30 जून ताई नी जावेला। काल ऊं 15 जुलाई ताई दिल्ली ऊं टोरंटो, वॉशिंगटन, लंदन, पैरिस, वियना, मेलबॉर्न अर टोकियो री उड़ानां री तादाद कम करी ज्यी है।

000

अन्तर्राष्ट्रीय योग दिवस काल मनायो जावेला। 11वां अन्तर्राष्ट्रीय योग दिवस रो ई साल रो मुद्दो **एक पृथ्वी—एक स्वास्थ्य के लिए योग** राख्यी ज्यो है। ई सिलसिला मांय देशभर मांय जोर—शोर ऊं तैयारियां करी जा रही है। योग दिवस रे मौके आयुष मंत्रालय री ओर ऊं आंध्र प्रदेश रा विशाखापट्टनम मांय राख्या जावण वाळा राष्ट्रीय कार्यक्रम मांय प्रधानमंत्री नरेन्द्र मोदी ई सिरकत करेला। ई मौके संस्कृति मंत्रालय री ओर ऊं देश री एक सौ नामी ठौड़ां अर विरासत वाळी 50 ठौड़ां योग सत्र राख्या जावेला। प्रदेश मांय ई योग दिवस ऊं जुड़यो उमाव निजर आ रह्यो है। राज्य स्तर रो जळसो जैसलमेर मांय खुहड़ी रा रेतीला धोरा मांय राख्यो जावेला, जिण मांय मुख्यमंत्री भजन लाल शर्मा ई सिरकत कर र योग रे मार्फत निरोगा रहवण री अलख जगावेला। ई सागे ई सगळा जिलां, उपखण्डां अर ग्राम पंचायत मुख्यालयां माथे ई सामूहिक योगाभ्यास रा कार्यक्रम राख्या जावेला। न्यारा—न्यारा शैक्षणिक संस्थानां अर सामाजिक संगठनां री ओर ऊं ई योग सत्र राख्या जा रह्या है। योग दिवस री पैली वाळी सिंज्यां आज बांसवाड़ा, अजमेर, बाड़मेर, पाली, झुन्झुनू, बालोतरा, जैसलमेर अर डीग समेत केई ठौड़ां जागरूकता रैली निकाळी ज्यी। इण रे मार्फत योग रा फायदां री जाणकारी देता थकां इण ने रोजमर्रा री जिन्दगी मांय शामिल करण री अपील करी ज्यी। जयपुर रा सेन्ट्रल पार्क मांय आज सिंज्यां योगाभ्यास रो खास कार्यक्रम राख्यी ज्यो, जिण मांय राज्यपाल हरिभाऊ बागडे अर उद्योग मंत्री राज्यवर्धन सिंह राठौड़ ई सिरकत कीनी। क्षेत्रीय समाचार एकांश री ओर ऊं ई योग ऊं जुड़बा सारू जाग जगावण बाबत् विशेष संदेश श्रृंखला चलायी जा रही है। आज पेश है राजस्थान संस्कृत विश्वविद्यालय रा सहायक आचार्य शास्त्री कौशलेन्द्रदास रो संदेश—

000

राष्ट्रपति द्रौपदी मुर्मू दिव्यांगजन ने जिन्दगी रा हर हलका माथे बधावो देवण माथे जोर दीनो है। वे आज उत्तराखण्ड रा देहरादून मांय **राष्ट्रीय दृष्टि दिव्यांगजन सशक्तिकरण संस्थान** मांय विद्यार्थियां ने संबोधित कर रही ही। वे कह्यो के दिव्यांगजन उन्नत तकनीक री मदद ऊं मुख्यधारा ऊं जुड़ र असरदार योगदान दे सके है।

0000

जयपुर रा राजभवन मांय आज गोवा, तेलंगाना, सिक्किम अर पश्चिम बंगाल रो स्थापना दिवस जळसा सागे मणायी ज्यो। ई मौके राज्यपाल हरिभाऊ बागडे आं राज्यां ऊं आ र प्रदेश मांय रह रह्या लोगां सागे बातचीत कीनी। वे कह्यो के **एक भारत—श्रेष्ठ भारत** री सोच रा तैत राजभवन मांय आं राज्यां रो स्थापना दिवस मणायो जा रह्यो है। श्री बागडे आं राज्यां री जन आस्थावां, प्रेरक व्यक्तित्व अर सैर—सपाटा री सोहवणी ठौड़ां रा बारा मांय ई चर्चा कीनी। वे सगळां ऊं **राष्ट्र प्रथम** री सोच सागे काम करण बाबत् कह्यो।

000

प्रदेश रो खान विभाग चालू माली साल मांय 17 जून ताई एक हजार 670 करोड़ रुपया री रिकॉर्ड आमदनी हासिल कीनी है, जो ई अवधि री हाल ताई री सब ऊं बत्ती कमाई है।

विभाग रा प्रमुख सचिव टी. रविकांत आज उदयपुर मांय अहलकारां सागे राख्यी ज्यी मीटिंग मांय आ जाणकारी दीनी। वे बतायो के महकमो माइनिंग प्लान ने ऑन लाइन तरीका ऊं मंजूरी देवण री व्यवस्था कीनी है। श्री रविकांत बतायो के प्रदेश मांय खनिजां री खोज रा काम मांय सरूआती तौर ऊं एआई आधारित मशीन लर्निंग सिस्टम काम लियो जा रह्यो है।

000

प्रदेश मांय मत्स्य पालन विभाग 31 अगस्त 2025 ताई साफ पाणी रा तळावां री मछलियां री बिक्री माथे रोक लगा दीनी है। विभाग री निदेशक संचिता बिश्नोई बतायो के हुकम नी मानण वाळा रे खिलाफ कानूनी कार्यवाही करण सारू विभाग जांच दल बणाया है। मछलियां ने बचावण अर वां रा पिरवार मांय बधोतरी ने ध्यान राखता थकां चौमासा मांय मछली पकड़बा माथे हर साल रोक लगायी जावे है। महकमा रो जांच दल आज जयपुर मांय मछलियां ऊं भरी पिकअप ज़ब्त कीनी। इण मांय करीब 1200 किलोग्राम मछलियां बिक्री सारू ले जायी जा रही ही।

000

सिरोही जिला रा आबू रोड मांय ब्रह्मकुमारी ईश्वरीय विश्वविद्यालय परिसर मांय आज मोदी सरकार रा 11 साल री उपलब्धियां रो दरसाव करण वाळी प्रदर्शनी सरू व्ही। पत्र सूचना कार्यालय री ओर ऊं लगायी ज्यी दो दिन री ई प्रदर्शनी रो जालौर-सिरोही रा सांसद लुम्बाराम चौधरी उद्घाटन कीनो। केन्द्रीय संचार ब्यूरो री अपर महानिदेशक ऋतु शुक्ला बतायो के प्रदर्शनी मांय केन्द्र सरकार री खास योजनावां अर उपलब्धियां रो दरसाव करी ज्यो है।

000

वंदे गंगा जल संरक्षण जन अभियान पूरो व्हेवण रे मौके प्रदेशभर मांय पाणी बचावण री अपील करी ज्यी। पांच जून ने चलायी ज्यो ई अभियान रा तैत कूड़ा-बावड़ियां री साफ-सफाई करण अर पाणी ने सावचेती सागे काम लेवण री अपील सागे मोटी तादाद मांय पौधा रोपी ज्यो। अभियान रा तैत मदद करण वाळा भामाशाहां अर सामाजिक संस्थावां रो मान करी ज्यो। ई दौरान पाणी बचावण री शपथ ई लीरीजी।

000

केन्द्रीय सड़क परिवहन अर राजमार्ग मंत्री नितिन गडकरी कह्यो है के देश मांय हाल रा बरसां मांय माल ढुलाई रा खर्च मांय खासी कमी आयी है जो आवता बगत मांय और कम व्हे र नौ फीसदी कने रह जावेला। आकाशवाणी समाचार सागे खास बातचीत मांय श्री गडकरी कह्यो के इण ऊं देश रा विकास मांय मदद मिलेला।

000